



Publicaziuns dalla vischnaunca, jamna 24

Votaziun federala e communal

L'urna principala en casa communal ei aviarta sco suonda:

Sonda 16-6-2012 18.30–19.30
Dumengia 17-6-2012 9.00–11.00

La documentaziun da votar duess mintga votant(a) haver obteniu. Cass cuntrari san ins s'annunziar immediatamein, denton **sil pli tard entochen venderdis, ils 15 da zercladur 2012 allas 17.00** tier l'administraziun communal (tel. 081 920 36 36).

Levgiament da votar

Mintga votant(a) ha la pussevividad da dar giu sia vusch a scret. En gliez mument sto el/ella observar il suadont:

1. Emplenir ora ils cedels da votar e metter quels en la cuviarta da votar e serrar giu ella.
2. Metter la cuviarta da votar ensemen cun il certificat dil dretg da votar **suttascret** en la cuviarta, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (**suppli cau da francar**) ni directamein fierer en la scaffa da brevs dalla casa communal.

Ils cedels da votar ston esser **sil pli tard la sonda, ils 16 da zercladur 2012 allas 12.00** tier l'administraziun communal. Il certificat dil dretg da votar ei da suttascriber. **Senza Vossa suttascripziun cun agen maun ei la votaziun nunvaleivla.**

Suprastonza communal Disentis/Mustér

Stradun cantunal – Via Sursilvana

Ils 17 da zercladur 2012 han vischinas e vischins da decider davart il credit per la sanaziun dalla via principala atras il vitg. Quella ei en in schliet stan e basegna urgentamein ina sanaziun totala, ton pli ch'ei setracta d'in stradun fetg frequentau. Ei va per ina ovra comunabla dil cantun e dalla vischnaunca che vegn realisada els proxims treis onns. Ferton ch'il **cantun surpren rodund 1,8 milliuns francs**, sto la vischnaunca separticipar cun biebein **1,4 milliuns francs** al project.

Ina realisaziun ei mo pusseviva, sche omisdus partenaris separticipeschan. Il cussegl da vischnaunca recamonda unanimamein – en concordanza cun la suprastonza communal – d'approbar il project e da conceder il credit necessari.

Cussegl da vischnaunca

Seivs mobilas per la pasculaziun

Tenor art. 75, al. 1 dalla lescha da baghegiar ston seivs mobilas vegnir allontanadas *immediatamein* suenter la pasculaziun. Quei vala era per seivs da gatter. Igl unviern vargau ein differentas seivs buca vegnidas allontanadas. Entras quellas seivs ein capitai differentis accidents cun animals selvadis. Tals accidents san vegnir evitai.

Pigl atun proxim vegnan ils organs da catscha e la vischnaunca a controllar, schebein quellas seivs ein vegnidas allontanadas. Las seivs buca allontanadas vegnan allontanadas senza avisar ils pertuc-cai sin donn e cuost dil proprietari da terren.

Nus supplichein da prender enconuschientscha da quei fatg e prender las mesiras prescrettas.



Inscripciuns e reclamas

Tenor art. 77 dalla lescha da baghegiar ein tablas d'informaziun ed inscripciuns lubidas, sch'ellas disturban buc il maletg dil vitg e dalla cuntrada sco era la segirtad dil traffic. Reclamas da baghegiar ein d'allontanar il pli tard a caschun dalla collaudaziun. L'inscripziun sedrezza tenor la reglamentaziun communal corrISPundenta.

Pertuccont la segirtad da traffic fagein nus attents, ch'igl ei scumandau da postar agl ur dalla via resp. sin passapeis tablas moviblas cun inscripciuns. Talas tablas impedeschan la veta sil traffic e periclitteschan persunas ed en special ils affons che spetgan agl ur dalla via. Tablas sin passapeis ed agl ur dalla via che periclitteschan la segirtad da traffic vegnan allontanadas entras ils organs communal resp. entras la polizia da traffic.

En quei connex avisein nus al fatg che inscripciuns e reclamas ston esser en lungatg romontsch. Il text romontsch astga vegnir completaus cun in lungatg jester.

Disentis/Mustér, zercladur 2012
Suprastonza communal

Cartas da viagiari dil di (Flexicard) – midadas

La viafier ha augmentau il prezz dallas cartas da viagiari dil di. Ord quei motiv vegn naven digl 1. da schaner 2012 il prezz per cartas da viagiari dil di (Flexicard) adattaus da frs. 38.– sin **frs. 40.–/carta**. Plinavon vegn la vendita dallas cartas *restrenschida sin persunas domiciliadas en Surselva*.

Nus engraziein per Vossa capientscha.
Administraziun communal

Onn da scola 2012/13

Prezzai geniturs ed affons

Ils uraris da scola ed igl urari dils transports per il proxim onn da scola 2012/13 ein d'anflar naven d'immediat sin nossa homepage dalla scola www.scoladisentis.ch. En num dil cussegl da scola e dil cerchel scolastic engraziel a Vus per la buna collaboraziun duront igl onn da scola che va alla fin e giavischel a Vus tuts bialas vacanzas da stad.

Kai Hinrichsen, meinascola

Uniun da catschadurs Péz Alpetta *Salvament d'anseuls*

Prezzai purs

Ussa ei il temps che las cauras cavriel fan ansiel. Stedi setegnan ellas si cun lur anseuls en praus che vegnan segai. Aschia vegnan mintg'onn anseuls per la veta entras maschinas da segar. Cun pign engaschi san ins evitar quei. Purs che fan fein en loghens nua che cavreuls setegnan si, ein supplicai da s'annunziar tier nus in di avon che segar. Aschia savein montar mintgamai ina bandiera el prau pertuccont. Entras il disturbi da quellas prendan las cauras ils anseuls ord il prighel.

Annunzias saveis far tier il cau da tgira sut la numera 078 817 72 30. Bien engraziament per Vossa collaboraziun.

Uniun da catschadurs Péz Alpetta: Il cau da tgira



Corporaziun manteniment da vias Mompé Medel

Invit alla radunonza generala dalla corporaziun manteniment da vias

venderdis, ils 15 da zercladur 2012 allas 20.15 el local
dall'Uniun da scursalar Mompé Medel.

Tractandas:

1. Elecziun d'in dumbravuschs
2. Protocol
3. Rapport dil president
4. Rendaquen per 2011
5. Rapport dils revisurs ed approbaziun dil quen
6. Elecziuns
7. Varia

Cordialmein envida
la suprastonza

Apparats d'udida

Gliendisdis, ils 25 da zercladur 2012, saveis Vus schar schubergiar e regular Vies apparat d'udida en Casa da tgira Sursassiala a Mustér che sesanfla en claustra ed a Curaglia. A Mustér ei il liug signalisau:

a Mustér naven dallas 14.00–ca. las 15.15 uras
a Curaglia naven dallas 15.30–ca. las 16.30 uras

L'uniun Pro Audito Chur, cun signur Arthur Jacomet fa quei survetsch per tuts interessents gratuita-
mein.

Cordiala invitaziun
Casa da tgira Sursassiala

Ludoteca Mustér

Liug/Ort: Halla Cons, tel. 076 494 39 92
e-mail: ludoteca@disentis.ch

Uras d'avertura/Öffnungszeiten:
Gliendisdis/Montag: 18.30–20.00
Gievgia/Donnerstag: 16.00–17.30
Venderdis/Freitag: 18.30–20.00

Biblioteca populara Mustér

Liug: Casa da scola, tel. 081 947 52 90, biblioteca@disentis.ch

Sut www.disentis.ch ni www.bibliotecas-surselva.ch anfleis Vus nies entir catalog bibliotecar.

Per e-mail saveis Vus reservar ina ni pliras medias ed enteifer 5 dis retrer ad emprest ellas en bibli-
oteca populara.



La biblioteca ei aviarta:

Gliendisdis 18.30–20.00 uras

Mardis 13.30–15.00 uras

Gievgia 16.00–17.30 uras

Venderdis 18.30–20.00 uras

Nies motto: Leger . . . tedlar . . . mirar . . . !
Nus selegrein da mintga viseta.

Biblioteca populara Mustér